

Dr. Mahathir, Thaksin hadiri dialog di Langkawi

KUALA LUMPUR 16 Julai — Perdana Menteri, Datuk Seri Dr. Mahathir Mohamad dan rakan sejawatnya dari Thailand, Thaksin Shinawatra, dijangka menghadiri Dialog Teknologi dan Perkongsian Perniagaan Malaysia-Thailand di Langkawi pada 27 dan 28 Julai ini.

Dialog anjuran bersama Kumpulan Industri-Kerajaan Untuk Teknologi Tinggi Malaysia (MIGHT) dan Agensi Pembangunan Sains dan Teknologi Thailand (NSTDA) itu diadakan dengan tujuan mempromosi kerjasama lebih erat dalam pemba-

ngunan teknologi dan ekonomi kedua-dua negara.

Presiden dan Ketua Eksekutif MIGHT, Datuk Dr. Ahmed Tasir Lope Pihie dalam satu kenyataan di sini hari ini berkata, kedua-dua negara menyedari mereka perlu menggunakan inisiatif dua hala yang sedia ada dan kekuatan masing-masing secara bersama bagi memastikan momentum pertumbuhan dapat diteruskan.

Dialog bertajuk "Meggunakan Perkongsian Strategik Perniagaan dan Teknologi Untuk Pertumbuhan Ekonomi" itu akan dihadiri 300 peserta.